

von Wulf Wager

Koin Reschpekt meh



Heutzutage hend de Jonge koin Reschpekt meh vor ra Krippe mit ihra statische Darstellong von dr Heilsgeschichte en Holz oder Plaschtik. Dr Jong von meira Nochbere – Sia wissat jo, des propere 150-Kilo-Prachtsweib – a 7-jähriger Kerle, hot zwischa de Johr oifach mit dene Krippefigura g'spielt. Mir hättet domols da Arsch voll kriegt, wenn mr die zerbrechliche Gipsfigürle au bloß scharf a'guckt hättet. Der Kerle aber hot net bloß mit dene Figura gspielt, sondern se au no mit andere Plaschtikfigura aus seim

Spielzeugarsenal ergänzt, wie wenn mr die Weihnachtsgschichte oifach so erweitertra kennt. Dr Heilige Josef isch durch da Batman ersetzt worda. Der hot au en schena Mantel a ond wahrscheinlich hot dr Jong denkt, dass der fliegende Maskamann ama Engel am näggschda kommt. Ox ond Esel hot er vorsorglich voma gigantische Tyrannosaurus Rex auffresse lasse. Der hot no au glei da Platz neba dr Krippe eignomma. Dui Krippe isch allerings durch an schwarza Porsche 911 ersetzt worda, auf dessen Beifahrersitz der neugeborene Heiland mit ama jesemäßige Tempo durch da Stall grast ischt. Wahrscheinlich hot'r denkt, dass an Kenig au standesgemäß fahra sott. Die Hirta send a paar blaue Schlümpfe gwäa, die em Spiderman nochguckt hend, der uf em Dach von dere Krippe romkräbselt ischt. Die Heilige Drei Kenig warat Plaschtikfigürle vom Bastian Schweinsteiger, vom Jerome Boateng ond vom Jogi Löw – also richtige Helda. Bloß hend die koi Weihrauch, Myhrre ond Gold brocht, sondern an GameBoy, Harry Potter Band 4 ond a leers Päckle Chicken McNuggets vom McDonalds.

An Silveschter hot dr Jong no des Jesusfigürle an a Rakete vom Aldi nabonda ond en da Orbit g'schossa. Vermutlich fühlt sich der Chrischtus noch dere feurige Hemmelfahrt dort oba viel besser als bei Batman, Schlümpfe, Tyrannosaurus ond Porsche 911. An guads, xonds ond chrischtlichs nuis Johr wensch

Ihr
Wulf Wager